



CROCUS apud Bohemos ob insignem iustitiam, fortitudinem, & prudentiã in maxima authoritate extitit. Cum itaq; hæctenus à morte Zechi Bohemia uarijs tumultibus fuisset agitata, atq; quisq; sibi principatum uindicare statuisset, tandem cõmunibus suffragijs Crocus ille omnium princeps constitutus est, circa annum Christi sexcentimum quinquagesimum. Erat huius tãta moderatio, ut ab omnibus subditis instar patris ueneraretur. neq; enim ad suam uoluptatem, sed pro subditorum utilitate & quiete prouinciã gubernauit, ferocemq; populum non tam imperio quàm beneuolentia quietum continuuit. Hic

arcem apud Stemnam condidit, quã de suo nomine Crocauiam nominauit. Moriẽs autem tres filias reliquit, Brelam, quæ herbarum ac Medicinæ perita Brelum castellum ædificauit, Therbam sortilegam, & Libuffam, quæ diuinarum & humanarum scientia omnes superauit, atq; postea Primislao nupta fuit. Aen. Syl. in Hist. Bohem. capite quarto,